

Kuzyiba Mpomweelede Kugolela

Kuti kamujisi balongwe mbomwiindene limwi zizo, eeco tacilubide pe. Pele mapenzi ayoobola ikuti kamutalibambilide kweebana alimwi akuti cakutazyiba kamulitondezya kuti tamumwani buyo amuntu ooyo. Ncinzi ncomukonzya kucita kutegwa cintu icili boobo citacitiki?

Kaambo kapati nkuzyiba mpomweelede kugolela. Kutegwa mucikonzye kucita oobo, amulange-lange zyakuluula zitobela alimwi akwiingula mibuzyo itobela.



MAKANI AAMASIMPE

“Wakali kuyeeya
kuti ndacinca
mizeezo”

Mukubusi wazina lyakuti Jason wakajisi cilongwe ciyumu amusimbi umwi. Wakaamba kuti: “Twakazuminana kuti kwakanyina makanze aakusyabana.” Nokuba boobo, Jason wakazumanana kumutumina tugwalo musimbi alimwi akuti kababa antoomwe. Wakaamba kuti: “Kucita boobo kwakali kulubizya. Musimbi wakali kuyeeya kuti ndakacinca mizeezo alimwi akuti ndakalimusyabide.”

Nokuba kuti bakalibandikide kale kujatikizya cilongwe cabo, nkaambo nzi musimbi ncaakabona kuti Jason wakalimusyabide?

Ino Jason wakeelede kugolela aali kutegwa akwabilile cilongwe cabo *kakunyina* kulitondezya kuti ulamuyanda musimbi?



“Ikuti musimbi watalika kuyanda zifwoto zyangu zyoonse nzyondituma a Intaneti, inga ndilimwwa kuti ulandiyanda.”
—Steven.

MAKANI AAMASIMPE

“Wakandaambila
kuti ndakali
kusobanya mi-
zeezo yakwe”

Annette wakali kubandika amusankwa umwi, lino waamba kuti twakali kucita oobo “kwiinda mbotwakeelede. Ndakali kuyeeya kuti mulongwe mubotu. Twakali kuba antoomwe ziindi zinji, pele tiindakajisi muzeezo wakusyabana anguwe. Alimwi ndakali kuyeeya kuti awalo tanaakajisi muzeezo wakuti inga twasyabana. Nokwakainda ciindi, wakandiyanda. Pele nondakamwaambila kuti tee tumwana buyo, cakamucisa. Wakandaambila kuti ndakali kusobanya mizeezo yakwe akuti ndakali kucita caali.”

Sena muyeeya kuti musankwa wakaliluzi kuyeeya kuti bakalisyabene a Annette? Ikuti naa mboobo, nkaambo nzi alimwi naa tabusyi, nkaambo nzi?



Ino Annette wakeelede kugolela aali kutegwa cilongwe citasiki waawa?




“Kuli kaambyo kakuti, ‘Nco-syanga, ncoyootebula.’ Takuli buyo kumupa muzeezo wakuti mulamuyanda ikukonzya kupa mizeezo iilubide; zimwi ziindi ikulekela muntu kuti azumanane kumubikkila maano kulakonzya kupa mizeezo iilubide.”—Karen.

MAKANI AAMASIMPE

“Lyoonse twakali
kulijana kuti tuli
tobilo”

Rachel wakali kuyeeya kuti musankwa wakali kumuyanda. Wakaamba kuti: “Bantu boonse bakali kubona kuti lyoonse twakali kujanika antoomwe. Ciindi cimwi mane wakandikumbata kwamaminiti aali mbwaabede. Ndakali kuyeeya kuti ulandiyanda, pele nondakamubuzya kujatikizya cilongwe cesu, wakandaambila kuti tumwana buyo, kunyina cimbi!”

Sena Rachel wakalijsi twaambo itwakali kumupa kuyeeya kuti musankwa wakali kumuyanda? Ikuti naa mboobo, nkaambo nzi alimwi naa tabusyi, nkaambo nzi?



Ino musankwa wakeelede kugolela aali kutegwa atapi muzeezo wakuti wakali kumuyanda musimbi ooyu?



“Inga kwaba kulicenga kuti muntu ngomwiindene limwi zizo kalitondezya kuti ulamuyanda, alimwi akuti andinywe mwacizumina kayi cilamukkomanisya. Pele citondezya kusima kuti kamubikka nzyobayandika bamwi mubusena bwakusaanguna mu-ciindi cazintu nzyomuyanda.”
—Brittany.